

BABŪNELĒS



kalvarats

DAUKONTĀTĒ
ADELĒ

ŠATEIKĒ (PLUNGĒS R.)

Rītmetis. Saulelē ķēš šnuobeli eš debēsūm līgo besmegenis eš viepotīniu. Mazguojēs morzelē rasuom, kap mamalē so mazgēnlakatio ka parbrauk par stala; tā tumet tas no rēibala dā daugiau blēzg. Tēp ē saulelē – nu anuos žvēlgsni pēivas blēzg mažās, mažās zelkiuoriokās... Vo rūks oudēga vēzgnē kap šou: tā šēn, tā tēn, tā pakrūmie makačiulōljēs...

Veiziejau i ton Pondēivali svieta atsēsiedosi luovuo, ronkuom ēsētvierosi ožuolaidas kraštieli, ka geriau pro stēkla matītiu, rītmetēni saulietekē tualeta... Tēp mona babūnelē vēsomet aple rītmeti joukas... Ē patē jouks sojiemē, tēk gērdo ka babūnelē so kažkou rokoujēs. Nenuorēs lēptē eš šēltūm patalūm, bat smalsoms nasvietēšks. Ēškēšau kuojēs ē padiejau anas ont mažuos kraselēs, katron someistravuojē buočielis, ka i luova lēngviau būtom ēlēptē. Ēsēspīriau i šliorēs, tilē prēslinkau pri doru. Mēslējau biškieli anas padarītē, bat socipē, kap pelie Balčiaus zūbūs. Ēšsēgondau: ēšgērs babūnelē ē barsēs, ka grieka darau – nagal paslaptiuom klausītēis.

Tilē atsēvēlkau kraselē prē doru, apsēsiautiau stuora babūnelēs koskelē ē atsēsiedau. Smalsoms bova dēdiesnis ož grieka baimē. Gērdo:

– Kon, kon, kon...

Babūnelē atsaka:

– Nasēdraskik! Tujau žēbala atnešo, patepso...

Vajetau! Sosiedē tor otēliūm. Vo katra? Kēšo sava šnuobelioka pro doris, bat tuos tēik mažā prasēdariosēs, ka nieka naēveizo. Biegtiau pas Magdelē, papasakuotiau naujīnas, ka sosiedēs pēlna makaulē otēliūm, matītēis navala īr, nasēpraus, vondēni čiedējē. Vo kam? Jok pēlnē šolēnē ē prūdā anuo īr...

– Kor kor kor, kor... – viel gērdu.

– Tujau, palauk. Ta mona makaulē... – babūnelē tajējē sosiedē. –

Vajetau! Pēlna spaliu... Vo eš kor anei?

Somēslējau, ka babūnelē sava akuliuorius kor nuors nokēša ē spaliu nu otēliūm nabskēr. Jou tuoliau, jou majedniau: monējē veizuolelē pletās ē zars kap baronkas būs.

– Kum kumet, kum kumet, kum kumet... – viel gērdo sosiedēs balsa.

– Čiopau kraselē, padui i luova. Tēk spiejau i anon atsēgoltē, ēpoulē babūnelē.

– Aniuolieli mona, jau atsēkielē? – tēp meilē i monēm paveiziejē, ka šērdēs apsala. – A sošalā, mažulieli? Patalelē sturē... Kam ta mona koskelē?..

Babūnelē nabaigē sakītē, vo aš jau anā ont kakla pakēbau ē klauso:

– A sosiedē jau ešējē?

– Kuoki sosiedē? – veiz babūnelē i monēm. – Musietās apsēsapnavā.

– Gērdiejau, kāp ruokavuotavuos.

Dā nabovau gērdiejosi tuokē babūnelēs jouka. Čiopa moni so



Daukontātē Adelē. Potuograps nežēnuoms. Portēgrapējē eš A. Daukontātēs archīva

vēsa koskelē, nosēnešē i truoba, pasvadēna ont dēdliuosēs krasēs ē saka:

– Tujau leikelē so žēbalo atsēnešo, kažkor nokēšau, tumet vedvē ē pasēklausisiau rokundas... – nošlepsiejē tēik joukdamuos, tēik joukdamuos.

Grižosi patepē kalvarata špūlē ē tekēni, ton vēita, kor kalē anon sok. Sieduos ont taburietēs ē pradiejē verptē. Ēš pradiūm kalvarats soborbiejē:

– Kon, kon, kon...

– Tujau, tujau, mažulieli... Baik kuosietē, patepiau – tujau taukā ēšsēlakstīs...

Kap sakē, tēp ē bova, tēk kalē luo:

– Kor, kor, kor, kor...

– Tau vēsa laika naožtenk, – joukās babūnelē. – Palauk, magaričiūom lašieli dā douso.

– Kum kumet, kum kumet... – cīpava pakuojis.

Babūnelē pasēlēnkē, pabarškēna pērštās, apčiopnuojē anon ē atsēdosa:

– Rēks meistra... Jau tēik belaikuos, soksēla...

Siedo ē jauto, kāp mona žondā kaist. Grieks lend laukon.

– Bēnē karšti tori, mona aniuolieli? – pridiejē ronka prē kaktuos. – No ne, šalta...

Kuoki karšti? Ka babūnelē žēnuotom, kuoki dēdēli grieka padariau šērītās... Bluogā aple sosiedē pamēslējau ē būtiuo Magdelē papasakuojosi – anā grieka ožtraukosi... Tujau pat somēslējau, ka apsēriedīso ē biegs pas sosiedē, anā malku prinēšo pečiou kortē. Bat pas katron rēk biegtē?... Aplinkou pēnkēs truobas... Rēks Magdelēs prašītēis pagalbas...